

समा. 09.20 Hrs

Headlines

1. दिल्ली दे लाल किले कोल होए दे कार बम धमाके च 8एं जनें दी मौत होई गई ऐ ते केई घाल होई गेदे न। प्रधानमंत्री ते गृहमंत्री होरें हालात दा जायजा लैता ऐ। वैष्णो देवी तीर्थ स्थान पर सुरक्षा निगगर करी दिती गई ऐ।
2. लैफ्टिनेंट गवर्नर मनोज सिन्हा होरें छत्तीसगढ़ च आई.आई.टी भीलाई दे सालाना दीक्षांत समारोह च भाषण दिता। उनें स्नातकें गी नमीं काड्डें च अगगे रौहने ते भारत दे तकनीकी विकास गी गति देने दी अपील कीती।
3. नगरोंटा ते बडगाम च रमानदारी कन्ने वोट पाए जा करदे न। बड़ी मती गिनतरी च मतदाताएं आसेया अपने वोट पाने दे अधिकार दी बरतून करने दी मेद ऐ।
4. राष्ट्रविरोधी तत्वे खलाफ कारवाई करदे होई अनंतनाग ते कुलगाम च तलाशी आहला बड़डा अभियान चलाया गया।
5. जम्मू दी हवा च प्रदूषण कन्ने निबड़ने लेई जे.एम.सी. नै उपा कीते न।

Delhi Blast

दिल्ली चा ताल किले कश कल संजा होए दे जबरदस्त कार धमाके च 8 लोक मारे गे ते कैई सारे घायल होए न। एह धमाका कल संजा 7 बजे इक कार च होआ- जेडी ट्रैफिक सिग्नल पर

रुकी। इस धमाके करी आले-दोआले दी गड़डियें गी बी नुक्सान पुज्जा ते कैंई लोक घायल होई गे। गृह मंत्री अमित शाह होरें आखेया जे इस बारे जांच पर पैहलु कन्नै कीती जाग।

प्रधानमंत्री नरेन्द्र मोदी होरें इस धमाके मगरा स्थिति दा जायजा लैता ते गृह मंत्री अमित शाह हुंदे कन्नै गल्ल कीती। गृहमंत्री होर अज्ज इक उच्च सतह दी बैठक च स्थिति दा आकलन करगंन। तांई वैष्णो देवी श्राईन बोर्ड कटरा च बी सुरक्षा बवस्था होर निग्गर करी दिती गेई ऐ।

<><><><><><>

LG- Bhilai

लैफ्टिनेंट गवर्नर मनोज सिन्हा होरें छत्तीसगढ़ च IIT भीलाई दे सालाना दीक्षांत समारोह च भाषण दिंदे होई आखेया जे साढ़ा मुख उद्देश्य आधुनिक नमीं काड्डें राएं जीवन च सुधार आनना ते आर्थिक विकास गी गति देना ऐ। उनें ग्रैजुएट होआ करदे इंजीनियर ते साईंसदानें गी नमें क्षेत्रें दी खोज करने- निडरता अपनाने ते नमीं काडडे च अग्गे होने लेई वैज्ञानिक सिद्धांतें गी व्यावहारिक समाधानें च तब्दील करने दी अपील कीती। उनें AI आटोमेशन-परती-परतियें बरतोने आहली ऊर्जा-रक्षा ते बायोटेक्नालोजी दे क्षेत्र च उपलब्ध मौकें दा जिक्रा कीता।

<><><><><><>

Polling

नगोरटा ते बडगाम विधानसभा हलकें च अपने नुमायंदें चुनने लेई अज्ज बड़ी मती गिनतरी च मतदाताएं आसेया वोट पाए जाने दी मेद ऐ। नगोरटा च बड़े मते सख्त सुरक्षा च मतदान दा

कम्म अमन-शांति कन्नै शुरु होआ। तकरीबन 98 हजार मतदाता-10एं मेदवारें दे भागें दा फैसला करगंन। वोट पाने लेई 150 मतदान केन्द्र बनाए गेदे न।

बडगाम च मतदाता 17एं मेदवारें दे सियासी भागें दा फैसला करा करदे न। वोट पाने दा कम्म संजा 6 बजे तोड़ी रौहग। अधिकारियें लोकें गी अपने वोट पाने दे अधिकार दी बरतून करने दी अपील कीती ऐ। वोटें दी गिनतरी 14 नवम्बर गी कीती जाग।

<><><><><><>

CS Homestays

मुख्य सचिव अटल डुल्लु होरें सैलसफा मैहकमे दी होमस्टे सरबन्धी नीति गी लागू करने दा जायजा लैता ऐ। एदा मकसद समूलचे जम्मू-कश्मीर च सामुदायक आधारत सैलसफा गी बढ़ावा देना ऐ। उनें डिजिटल मौजूदगी- होमस्टे गी ऑनलाईन बुकिंग पोर्टल एकीकृत करने ते व्यापक दृश्यता लेई सोशल मीडिया दी बरतून करने पर जोर पाया ऐ। डुल्लु होरें माली सहायता दा आहवान कीता ते जम्मू-कश्मीर बैंक सवां- होमस्टे मालके लेई कर्जे देने सरबन्धी सरिस्ता शुरु करने दी अपील कीती। अधिकारियें रजिस्ट्रेशन कराने दे कम्मै गी सौकखा बनाने- ग्रेडिंग प्रणाली ते QR आधारत अदायगी राएं ग्राहके दे तर्जुबे गी होर खरा बनाने बारे सोच-विचार कीता। मुख्य सचिव होरें पंजीकृत होए दे तकरीबन ढाई हजार होमस्टे दा जिक्र करदे होई आखेया जे नीति गी बेल्लै सिर लागू करने कन्नै केन्द्र शासित प्रदेश च मुकामी समुदाय होर बाईख्तेयार होगंन- रोजगार पैदा होगंन ते दूर-दरेडे इलाके च सैलसफा गी बढ़ावा थोहग।

<><><><><><>

Search Ops.

अनंतनाग ते कुलगाम पुलस आस्सेया जिले च कन्नू बवस्था गी बनाई रखने- उसी मजबूती देने ते राष्ट्र विरोधी गतिविधियों पर काबू पाने लेई तपाशी अभियान चलाए गे। अनंतनाग पुलस दी टीम नै सुरक्षा बलें कन्नै लाल चौक अनंतनाग ते Kheribal जिला जेल कश छापेमारी कीती। एह छापेमारी जम्मू-कश्मीर दे ओह बसनीक जेड़े -पाकिस्तान यां पाकिस्तान दे गैर-कन्नूनी कब्जे आहले जम्मू-कश्मीर JKNOP कन्नै जुड़े दे न ते जिनें लोकें UAPA तैहत पाबंदियां न- उंदे उत्थे कीती गई ऐ। कुलगाम पुलस नै JKNOP ते OGW दे 8 रिश्तेदारें गी हिरासत च लैता ऐ ते उनेंगी Central Jail अनंतनाग भेजी दिता गया ऐ। इस छापेमारी दा मकसद आतंकवाद सरबन्धी नैटवर्क गी खत्म करना ते लोकें दी सुरक्षा गी यकीनी बनाना ऐ।

<><><><><><>

Satish Sports

खेड मंत्री सतीश शर्मा होरें आखेया जे सरकार जम्मू-कश्मीर च खेड्डें सरबन्धी माहौल गी बढ़ावा देने लेई वचनबद्ध ऐ। एह गल्ल उनें श्रीनगर DOWNTOWN ते आहले-दोआहले दे इलाकें च खेड्ड मैदानें दा दर्जा बढ़ाने आहले कम्मै दा नीह पत्थर रखने मगरा आकखी। मंत्री होरें कोचिंग प्रोग्रामें ते प्रतियोगिताएं राएं खडारियें गी बढ़ावा देने- उंदी खेड्डें च शमूलियत बढ़ाने ते जम्मू-कश्मीर गी खेड्डें दा इक केन्द्र बनाने दा भरोसा दोआया।

<><><><><><>

जम्मू म्यूनिसिपल कारपोरेशन आसेया शैहर च बददे हवा प्रदूषण गी काबू च करने लेई अपने जत्ने गी तेज करी दिता ऐ। इत्थे AQI दी स्तर 179 पुज्जी गया ऐ। जे.एम.सी. दे कमीशनर डाक्टर देवांश यादव होरें रातीं बेल्ले सिड़कें दी सफाई करने- दिने पानी छिड़कने ते धूस गी घट्ट करने आस्तै Anti Smog Guns दा इस्तेमाल करने लेई हिदायतां दितियां न। इसदे इलावा निर्माण आहली थाहरें लेई जारी दिशा-निर्देश दी पालमा सरबन्धी माल ढोने आहली गड़डियें गी पूरी चाली सील करने लेई बी आखेया गया ऐ। नियमें दी खिलाफवर्जी करने आहलें नै सख्ती नै निबड़ेया जाग ते जुर्माना बी लाया जाग। ठोस कचरा प्रबंधन- खुल्ले च नैई कचरा फूकने लेई बी आखेया गया ऐ। कमीशनर होरें लोकें गी अपील कीती ऐ जे ओ क्लीन जम्मू- ग्रीन जम्मू जत्न तैहत सहयोग करन ते शैहर दी आबो-हवा गी साफ-स्वच्छ बनाने च सहयोग करन।

<><><><><><>

Vande Matram Jammu

वंदे मातरम दी विरासत दा जश्न जम्मू जिले च मनाया गया। इस दौरान देश-भक्ति आहली गतिविधियें ते सांस्कृतिक कार्यक्रमें दा आयोजन कीता गया। इसदे च प्रतिभागियें निबंध लेखन- गीत गाने ते चित्रकारी सरबन्धी गतिविधियें च हिस्सा लैता। इसदे च स्कूल-कालजें ते मुकामी लोकें हिस्सा लैता। जिला प्रशासन नै नेह कार्यक्रमें दी महत्ता गी उजागर कीता। इनें कार्यक्रमें कन्नै एकता- अखंडता ते राष्ट्र प्रति सम्मान दी भावना युवाएं च बददी ऐ। सांस्कृतिक गतिविधियां इसी होर बी बेहतर ते शानदार बनांदियां न।

<><><><><><>